

睫閣詩鈔

丁巳秋日

門下士金保權署檢

睫閣詩鈔 卷

共 4 册 存 4 册 排架号 08188

温州市图书馆

索书号码 75.45  
1163

登记号码 09504

共4册

温州

1163

睫

闞

詩

鈔

月戌  
付午  
印正

睫闇詩鈔序

虞書云詩言志魯論云詩三百一言以蔽之曰思無邪詩教無窮也如是爲已矣古今詩人如恒河沙數而其詩如是則傳不如是則不傳夫三代以下如漢高項羽斛律金皆不學彼豈以詩人自命然而大風垓下敕勒諸歌至今傳之雖李杜韓蘇亦爲之心折首俯是何也彼得乎虞書魯論言詩之旨也所謂如是則傳也若詩人之詩則冠絕一時者不可多得漢

魏之際惟陳思魏晉之際惟步兵終南北朝則陶謝  
鮑庾而已唐以詩取士詩極盛矣然卓然大家入詩  
醇之選者亦李杜白韓而已宋則蘇陸凡六家自時  
厥後金之元遺山元之虞道園明之高青邱何大復  
稱焉然而降矣有明七子矯而學唐而世以優孟衣  
冠譏之我朝諸家矯而學宋世又以優孟衣冠譏之  
而詩不甚傳何也以彼未盡合乎虞書魯論言詩之  
旨也所謂不如是則不傳也然則詩之傳豈易言乎

讀吾 睫闇夫子之詩則實有可傳者 夫子之詩  
高則近太白大則近少陵特其才氣然耳豈規撫哉  
集中如都門秋懷如嶺南草如蜘蛛如寄張介夫如  
憶仲若如折樹歎如由水墘晚至后墩如感春諸篇  
皆逼近漢魏至於王母壽粵王臺禱雨龍山由碣石  
衛至金廂汎憇息昇天行醉時歌登白雲山過安期  
生祠遂詣九龍泉祈雨西樵呂祖閣諸作皆有閱古  
今傲風霆之氣則純乎屈宋之遺曾何李杜韓蘇之

足云蓋得言志之旨深也抑篤又嘗受詩於夫子

矣夫子曰吾人一言一行須有安身立命處作詩

亦然孟子曰為此詩者其知道乎不知道者不足以  
言詩古今詩人如麻惟陶徵士浣花青蓮昌黎眉山  
有然次則李義山陸放翁元遺山三子之詩亦能自  
道其意及退而玩夫子之詩其本諸安身立命以  
詠歌者不可枚舉乃知夫子以其所得者授篤也  
蓋得無邪之旨深也且夫夫子以名進士由郎署



改官來粵歷宰諸大邑每治事與民語丁寧委婉若  
恐重傷之者而治盜恆用重典常語人曰周漢以來  
名臣鉅儒論治無不明刑罰者然刑罰之本在於教  
養今吾日取不養不教之民而誅之疚心多矣每移  
任去父老攀轅截鐙途為之塞有出涕者是立德立  
功不朽之業大有在豈區區以立言傳哉初雋以刊  
行是篇請於夫子辭之曰古大家詩多則萬篇少則  
千篇余雖耽詩存稿僅爾而一行作吏此事遂廢偶

有觸託亦不過於馬背船唇得之我生不辰衷懷摧  
愴或多急微噍率之音遽以問世徒授人以吹索之  
柄可乎雋謂白詩多韓詩少皆大家也且白不敵韓  
詩豈以多寡論哉使所作有失乎虞書魯論孟子言  
詩之旨雖多亦奚以為 夫子領之雋遂校字以付  
梓舉吾 夫子之詩之所得述諸簡端以諗後之讀  
睫闇詩者庚子臘日受業張雋謹識

張雋博羅人字歛儕居羅浮山中家貧力學博通今古著作

宏富獲一衿老而不遇癸巳甲午秋聞余兩薦之均見擯於  
主司張文達公視學嶺南奏保績學之士三人君其一也  
特旨賞教職補東莞縣學官聞余難作殷憂廢食甲辰春遂  
不起年五十九今讀其序手墨如新為之出涕睫闇識

况

公

知

下

知

三

不步半五十大个... 行林百賞塔... 人国后... 家富... 余... 出... 入... 出... 入... 出... 入...

睫闇詩鈔序

廣生甫垂髫留意當世賢豪長者輒知霍邱有裴睫  
闇先生洎應童子試又出尊公浩亭夫子門下因得  
識睫闇並盡讀睫闇之所為詩睫闇未弱冠即挂名  
朝籍三十掇甲科將四十由戶部改官知縣初補廣  
東之陸豐既而歷番禺潮陽南海所至號稱難治而  
睫闇治之輒裕如遇有暇日則益肆力於詩牢籠萬  
有變化不測不識睫闇者疑其為汝潁之士狀貌瑰

異及一接顏色乃知恂：儒雅語言若不忍造怒於  
人也顧其中所蘊蓄磅礴鬱積雖所遭際極之他人  
畔援歆羨而不能得而其詩常若有所不豫而託之  
山巔水涯者嗟乎此姚惜抱所謂事有旁觀見為功  
名之美而君子中心欲然也假令睫閭少有宦情供  
職郎署平流而進當至監司中更衣樂外逼憂患求  
為承平貴游不得求為山林枯槁亦不得旁皇四顧  
日月急景始假縣令以效其繭絲保障之才兩宰首

邑嶺海多故遇有興革要政大吏傾心諮詢輒視睫  
間一言為行止然猶覩々泚々低首下心稍不自抑  
謗隨其後目中所見既非平日願見之人耳中所聞  
復非平日願聞之言若之何其不有遐心也因敘睫  
間之詩一及之世有知者當以廣生之言為悲世無  
知者幾何不以廣生之言為狂且瞽也光緒辛丑如  
皋冒廣生敘於廣州南海縣署

嶺南金保福書

不自覺主始於南

不自覺主始於南

不自覺主始於南

不自覺主始於南

不自覺主始於南

不自覺主始於南

不自覺主始於南

况

矣

也

即

也

三



睫閣詩鈔序

余嘗以為文章之成也有三賦之自天者曰才造之於人者曰學惟境也者天與人交致而不可一闕天予以特殊之境矣人或不勝其艱困無復聊賴甚者墮其氣而殞其身不善於承天足以昌其才與學者轉自負之是豈天之咎與天寶之亂杜子美以稷契自命而流離飢寒卒不得一效故發為詩歌冠絕有唐其後蘇子瞻以命世之才安置黃州七年已老猶

為儋耳萬里之行故子瞻詩文亦以海外為極盛向  
使彼二子者不能亨其心以順受則其境固非生人  
所堪亦與尋常之夫歎息悲憂以至於死而已耳烏  
得有鴻博絕麗之辭以至於今乎是故有境乃可成  
其才亦必有學乃可用其境吾益以知義理之學之  
不可一日去身即求之文章而亦然也霍邱裴伯謙  
先生以名進士出宰粵東才略頗見於世矣乃迂大  
府意羅織之幾不測既不得其罪狀猶逼償巨萬金

且永成新疆行更寒暑一僕又中道斃丙午到成戌  
申乃赦歸、逾年值國變而伯謙已將六十矣是其  
境與子美子瞻畧同余初聞伯謙於肯堂伯謙亦因  
肯堂而知余今年初夏乃相晤於馬君冀平座上伯  
謙即出其生平所為詩曰吳船嶺雲西征化城東歸  
風泉諸集以示余且使為之序余讀之愛不能釋因  
屏百務窮十日力乃竟因嘆曰嗟乎若伯謙之詩可  
謂境不負才矣吾聞其家學以宋賢為根柢其赴北

庭也著河海昆侖錄於山川道路風俗政教考之基  
詳而余之所服膺者尤在能處憂患之中而不忘省  
察克治之功也然則伯謙之不負其境不更以學乎  
哉伯謙於古大家詩無所不學至其得力於杜蘇為  
多吳船嶺雲雨集才氣已為極盛至西征以後光氣  
發見尤可喜可愕足追並古人惜乎肯堂已前死不  
及見也余豈足以序伯謙之詩乎聊述所知以質之  
而已甲寅七月桐城姚永概序

睫闇詩鈔序

光緒丁未秋余客都下晤霍邱李肖峰給諫出示其鄉裴伯謙先生河海昆侖錄一書見其詩真趣灑然拍案狂喜曰此仙才也時先生方謫戍新疆不獲見私獨慕之未幾肖峰抗疏雪其枉詔許歸先生則漫游吳越間不克相並合癸丑冬皖帥倪公重其賢以父執敬之尊為上客余假歸北上見其人清癯靜默如空山道叟猿鶴不驚聆其言智慮深沉天趣盎盎

處亂世而能翛然自脫於塵埃之外私心歎詫謂得  
留侯之風而歎為弗及初先生尊考 浩亭先生殫  
精宋學同光間久官無錫民竺愛之先生少負奇材  
服膺庭教年十九以拔萃科貢京師廷試高等用刑  
部小京官旋成進士授戶部主事以詩文名都下光  
緒癸巳改廣東知縣補陸豐調番禺移補潮陽調南  
海時李文忠為粵帥尤絕重之壬寅大計以卓異薦  
癸卯粵帥舉人才以道員送部引見未及行而禍作

先生之任南海也廷旨捕南海康有為籍其家括嘗  
所往來書廉其黨先生奉檄偕知府王君存善往西  
林方為布政使與康交懼事洩令擇要人書藏之先  
生察其書皆通候往來任王君持以獻粵帥固未達  
也而西林則大恨即藉他事劾王粵帥右之僅免未  
幾移隴藩擢疆帥及是移督粵疆甫至輒檄司檄任  
劾為贓吏奪其官追贓急甚誓必殺既入獄日書文  
山正氣歌十通事吟咏有飽食手一卷便到羲皇前

語意度蕭然久之無左驗乃罰金八萬奏永成新疆  
此河海昆侖錄所由作也先生天亮超絕學靡不窺  
是錄擷兵政教哲之大原納諸山川景物往往一名  
一物化須彌於芥子之中實為前古所未有生平不  
治生產獨嗜古人書畫輒取珍藏海內賞鑑家推為  
第一法博士白希和訪先生於迪化復至無錫取所  
藏精品影照百餘種歸以誇示國人所鑄壯陶閣帖  
四十卷費踰十萬真跡多入其家而鍾太傅薦季直



表尤海內孤本甲寅春舟入淮河被劫燬於盜先生  
尤痛惜焉其詩刊者題曰睫闇詩鈔大抵由坡入杜  
韻藻天然浩乎天際真人之態吾嘗憶先生早歲魏  
科治績名天下中更險難放逐西戎皆與坡公等坡  
公志林成於海外論者歎造物特開是境以闢坡公  
未有之奇先生河海昆侖諸作成於西疆直與志林  
對壘而其詩之盛尤復類之意者天殆以坡待君耶  
蹟其老居幕府絕類杜處嚴公其境轉若坡公所未

逮往者杜公入蜀感山水之奇然後曠然雄絕天下  
吾淮蒼莽之氣睥睨江河先生隨節蚌川實為南北  
戰爭之地指揮談笑必有超然自得於坡杜之外者  
吾於詩無能為役雖老猶將就先生肄業及之先生  
其許我乎丁巳夏五月桐城陳澹然撰

睫閣詩鈔

姚叔節先生

方倫叔先生

函錄後

倫井三兄親家左右回奉

詳示欣感無已至所作序文承

謙公獎飾逾分惶

恐之至其中得力蘇陸一語本旨乃謂其詩機趣橫

生之處似東坡工整雅切之處似渭南然於其恢詭

變化雄肆不平處却少賅括我公意欲改作杜蘇

甚合鄙意即請代改照易弟處存稿已改矣謙公

又稱許奉贈二律不知暇時肯賜和否如能以瓦

礫易金玉尤為榮幸也敬頌

吟安弟永概再拜上

伯謙先生閣下前奉

環書後聞

台駕北旋故未作啟 大集承 命作敘精心數十

日屬倫老訂正再呈

教比聞已經親送但未相直想早

澈覽不知便堪用否然亦竭吾才矣 大集久留敝

處愛不忍釋既以讀古賢集之法妄加丹記又擇抄

數十首留為師法故稽遲未繳今謹封納乞

恕之為荷專上敬頌

政安不盡所懷永概再拜上狀

大詩沈潛諷誦古懷騷情真杜公所云先生有道出  
義皇先生有才過屈宋者也安以窺管之天著於筆  
墨不過愛慕不能自己其實無當於高深幸

先生垂答烏拙詩一冊乞

擲下本思續獻其餘冀邀

大匠斤斧

政務如山未敢瑣瀆姑待清宴於異日矣敬請  
伯謙先生政安守彝再拜

伯謙先生執事奉

書伏承推獎過分惶恐汗下守彝嗜韓則有之實未能窺見深處迨於衰劣來日催人恐遂不能遂其區區之志矣

大詩昨略讀首冊數十首天驥高步多驚人奇響當深讀之奉為導師亦即轉語井節以當

尊旨問津李杜必以昌黎為先導此名論不可朽也率復敬請

道安弟守彝百叩

睫閣詩鈔

俞礪士

方倫叔

王晉卿

姚叔節

先生評本

宋芝洞

陳叔允

范肯堂

題詞

喜晤伯謙先生承示大著並命序詩蓋兩人之

相知均由肯堂也爰賦二律敬希正和

姚永概并節

萬里黃河寫入懷如君踪跡頗奇恢世傳南海多神

怪人羨東坡有吏才夜靜虹生顛米舫秋高風起粵  
王臺一官丹荔黃蕉底十五年前似夢回

走馬崑崙雪壓鞵隨身孤劍與爭寒山川雄異開詩  
境天地蒼茫到筆端君幸生還看世變我從死友結  
新歡太沖價自三都貴作敘何須待士安

叔節寄來伯謙先生詩敘屬彛交去因題其後  
以為贈先生文學政事宿有聲聞絕域歸來  
名益高而道之養者抑尤深矣

方守彛倫井

丹穴一遠探高張鳳凰聲九苞垂五色音與箛韶成



向來毛羽輩止解啁啾鳴老雅太憨直黃鳥多哀矜  
勢利笑燕鵲文雉乃不貞山雞與孔翠默々妬華榮  
驕人惟百舌如簧美流鶯要皆河伯爾龐然秋潦橫  
試與聽朝陽能不海若驚干莫本良冶矯々雙龍祀  
一自埋獄底寶氣照分野从此出世間妖魔白晝寡  
吁嗟統指柔端歸百鍊者

甲寅九月十五日讀竟伯謙先生吳船嶺雲西  
征化城風泉東歸諸集窺測所及散記於各  
篇上方復題一律表嚮往之微希教正之

方守彝倫并

餘生幸接大我仙漢、湖江吞楚天

山谷和坡詩云  
公如大國楚吞

五湖虎豹虬龍風月事惠瓊儂耳古今賢襟懷洒落

遺塵累造化往來成咏篇未免杜陵憂國恨回頭天

寶淚如泉

嶺南金保福書



*[Faint bleed-through text from the reverse side of the page, including characters like '自對', '嶺南', and '金保福']*

睫間詩鈔各集詩目

吳船集上卷 古今體詩一百十八首

吳船集下卷 古今體詩一百十七首

嶺雲集上卷 古今體詩七十五首

嶺雲集下卷 古今體詩八十九首

西征集上卷 古今體詩八十二首

西征集下卷 古今體詩八十二首

化城集上卷 古今體詩五十一首

化城集下卷 古今體詩四十四首

東歸集一卷 古今體詩四十八首

風泉集

古今體詩一百十三首至丁巳

年止

共八百十九首

西風集

古今體詩八十二首

西風集

古今體詩八十四首

西風集

古今體詩八十六首

西風集

古今體詩八十五首

西風集

古今體詩一百十六首

西風集

古今體詩一百十八首

西風集

西

睫閣詩鈔卷一

吳船集上卷

霍邱裴景福伯謙著



嶺南金保福受荃書

登金剛台山頂十歲時作

未曉平分日方晴下見雲登高回首處烟霧滿人羣

初至金陵

形勝當年壯帝閣東南王氣至今存山連龍虎開軍  
帳江擁金焦下海門鐵鎖烟銷天塹險春燈影落御  
溝昏惟餘一碧臺城柳風雨蕭疏幾斷魂

便是杜公後  
身語有涵蓋  
方評

桐城道中

春城浮渡近春擔  
稷蘭天雨綠枯楊  
岸風香野薺田  
微名勞馬走晴色  
驗龍眠得得前村  
去青帘數酒錢

晚過小姑山

彷彿凌波駐洛妃  
靈旗斜照閃巖扉  
山啣傑閣浮江  
去雲吐疏星帶月  
飛萬馬黃巾窺渡  
後千尋鐵鎖仗  
功微東南今古資  
天塹容易中流幾  
石磯

授書圖

名世何曾讀五車  
牙籤煙海解人虛  
羽陵萬軸秦灰  
冷圯上偏留佐帝書

## 泰安道中寄內子淮陰

夜雨淮南打疊齊博山香盡下簾屏  
鐘聲驚起烏啼  
早晚日長堤駿馬嘶

倚枕燈殘欲睡遲客衾風味昨宵知  
東風似解離人意不送黃鶯送子規

春到樓頭萬柳絲井梧一葉是歸期  
斜陽茅店炊烟起彷彿高堂閭望時

琅琊道上麴成塵漂母祠邊草似茵  
松火遠明村犬吠一弓新月晚行人

## 夜行

一燈明向月華分  
隔岫溪山繞白雲  
颯颯微風生絕壑  
蕭蕭落葉滿孤墳

晚過舊縣

暝色鄉心悄  
孤帆秋水生  
叢蘆一雁下  
疏柳亂蟬鳴  
客路連滄海  
人烟冷廢城  
晚來風正利  
今夕宿淮平

金陵送張佺老渡江

三山門外枯柳樹  
搖落秋風卧秋雨  
朝朝暮暮秦淮潮  
送盡行人老  
江渚篷窗倚岸吳  
見家一丈烏榜為  
生涯赤足踏浪自  
來去繫船樹根新  
月斜隔江渺渺  
浦口塔滿江蘆花  
白蕭颯獨尋莫愁  
採藕根藕葉離

不減唐人八月  
在葦花之作

興韻入古  
方評



披霜露繁

黃天蕩夜泊

月落楓林暗，星垂沙渚晴。  
昏崖深更逼，急漲響微明。  
孤枕愁風色，虛舟納夜聲。  
燈殘不成夢，吹地海潮鳴。

大雪泊下關

歲晚猶行役，高歌慰滯留。  
凍雲綴危石，疾雪漫寒流。  
波浪黃天蕩，帆檣白下舟。  
推篷惟瑟瑟，漁火荻蘆洲。

棲霞山宋帝行宮

繚垣一曲樹蒼蒼，匹馬南來作帝鄉。  
赤日雷霆生絕壑，青天神鬼閔虛堂。  
鑾輿不返中原駕，繒幣空資敵

奇警 方評

國糧王氣銷殘山色好老僧無意話興亡

桃花

晴雪初消暖意回深紅淺白倚欄開羣芳正荷東皇  
寵零落胭脂滿綠苔

秋試舟發無錫口號

九龍聳翠送行舟帆飽西風水急流笑指六朝山不  
遠桂花香裏過中秋

中秋登明遠樓

月明慣照秣陵游鎖院今宵更上頭淮水清縈夫子  
廟鍾山雄作帝王州金波圓滿三千界玉宇高寒十

神到之句也  
此之謂興象  
華妙方評

何減牧之  
方評

二樓冷眼嫦娥應笑我秋風又逐孝廉舟

晚過京口

揚子江深日欲斜暮潮平岸雁橫沙布帆一幅秋風裏  
無數青山送到家

宿奔流江口

大江風浩浩滅燭不成眠雁唳過前浦螢飛渡別船  
雄心搖永夜浪迹託長年明日青陽道題詩指惠泉

寄衣圖 宋人院畫

遙夜清砧搗明月涼秋思婦寄征衣萬里玉門關未  
到天山八月雪花飛

艮嶽樓高匹太清丹青寫出塞垣情傷心五國秋風  
早可有宵衣念父兄

重九登九龍山頂望太湖夜泛芙蓉湖盡醉而

歸

去年今日甘露閣碧瓦朱甍照城郭今年把酒九龍  
巔太湖明鏡翻微瀾七十二峰青鬱鬱勢與惠麓紛  
鈎連虎阜劍飛霸氣盡採香徑冷生寒烟鷓夷泛舸  
渺何處伍胥作濤吁可憐霸吳霸越一轉轂空餘水  
碧山嶺岼微茫落日僧窗紙畫舫明燈散霞綺峨眉  
玉盃琥珀濃醉吐錦裯尺有咫當筵度盡金縷曲須

史撒手溝頭水霜露沾衣胡不歸城上烏啼海雲紫  
主客行樂更何有入門擁被渴睡美登高儻無濟勝  
具牧豎腰腳殊堪鄙看花醉酒幾重陽容易西風楓  
葉黃何處青山非故鄉何處青山是故鄉

半間屋圖為余子泉題

大於蝸角小於舟終日垂簾不上釣言旣得一番清徹  
骨月明夜夜照牀頭

九龍山色淡如描一水芙蓉湖碧未消斜日微風歸擢  
後夜涼松竹雨瀟瀟

春風幾度過蓬萊無數瓊樓眼底來廣廈杜陵今不

見萬間何日為君開

七塲口營次別劉小泉參戎兼簡幕府諸君子

高岑王李  
初唐風格  
賦從軍詩  
此為正調  
俞確士評

空江萬鼓聲隆隆  
轅門落日車輪紅  
劉郎三十作都督  
登壇一笑無江東  
中原狐兔逐已淨  
侯王將相胥由命  
虎帳龍韜事等閒  
敲詩說劍真後勁  
書生帳下喜談兵  
榮戟光中畫燭明  
枚臬草檄今焉用  
王粲從軍舊有名  
劉郎太息肉生髀  
開懷痛飲葡萄醴  
廣陵風月度樓頭  
京口雲山落杯底  
侑座金釵雙鬢鴉  
當歡何事惜年華  
依依便折營前柳  
緩緩同歌陌上花  
青眼當今竟誰是  
芳情贈予蘭與芷  
大江帆鳥渺雲

天小隊弓刀照秋水揮手樓船烟霧迷雄心昨夜共  
聞雞若非西極來天馬會見北溟耀水犀

宿瓜洲

一夜揚州月流光照去舫潮連滄海白江截亂峰青

泊采石磯登太白樓尋然犀亭故處

遙天霞綺散烟汀桂醕招魂供奉庭江遠帆拖三楚  
白山多秋染六朝青高樓終古來明月深渚何人走  
百靈將略詩才久銷歇東流日夜下滄溟

由淮安至金陵

志遠能行路心平好度橋春風二三月楊柳萬千條

語樸而古  
方評

花暗蕪城兩帆明白下潮孤舟聞晚角滄海有驚飈

金陵送人遊關中

琴劍風流遠過秦何戡一曲渭城春紅樓美酒青溪

月庾信江南是主人

沈芳齋小照

湘筠小扇越羅裳銷瘦腰肢是沈郎明月玉簫呼酒

夜畫船燈火下橫塘

芙蓉湖水淨無埃繞郭龍山翠色來他日郊居成小

隱柴門應對九峰開

採藥圖

風流掩映  
方評



煙雨空山叫藥奴  
靈苗高下長平蕪  
日斜百草都嘗遍  
收得將軍國老無  
山中有鳥自呼藥奴  
鳥多處藥草必多

讀馬援傳

天水河西敢抗稜  
漢家赤伏數中興  
如何銅柱標南陲  
蓋世勳名為兩徵

范睢

賣趙圖韓策幾多  
分明德怨不嫌苛  
綈袍一贈驚無恙  
辯口將如摺齒何

庚辰春正月偕馬友琴盧椒孫兩孝廉公車入

破帽疲驢二千里天涯碧草漸成茵  
盧同馬異堪方駕柳色鶯聲趁早春  
舉酒看圓燕市月登山踏起岱宗塵  
三年小別東華路重向蓬萊望  
紫宸

過蒙陰縣寄舍弟錫山

春帆高唱渡江吟千里平蕪入望深  
海上殘雲來日照山頭微雨過蒙陰  
攜蔬領略長征味輪鐵銷磨遠到心  
前路定償登岱願吳閭練影可能尋

泰安道中

帶將曉夢出離亭拂面東風吹欲醒  
落日一鞭猶得得萬峰踏遍馬蹄青

若作萬峰青  
便是常語

遠山低簇黛眉橫  
曉日輕風過穀城  
行到徂徠新雨後  
連天嶽色萬松聲

天末浮雲隱落暉  
啣泥新燕傍人飛  
遙青一角僧樓峙  
數杵疏鐘出翠微

夜過晏城古墓

夜色蒼涼晏子城  
勞人何事促宵征  
月騰河漢飛螢沒  
雲暗松杉老鶴鳴  
零落山邱悲異代  
栖遲車馬戀深更  
前村聞有齊州釀  
獨酌還應醉到明

都門秋懷

紅塵蔽白日  
九門匯九州  
天樞宰群動  
人海納衆流

雞鳴起盥櫛日入不得休面面各相覷風霜張兩眸  
皇皇釜上蟻喋喋魚中鈎問我究何為一塵逐大漚  
殘書散滿架閉關枕高秋長鬢投片刺貴客已停驂  
衣冠肅之入所愧庭宇湫降心束闊步欲語箱在喉  
寒暄問答已舉茗示去留客去日已暝兀坐室南陬  
家童然明燭長案拭漆髻魚蔬稍羅列佐以齊東楚  
呼我我不食竊竊起眾咻朔風邊塞來澎湃而颼颼  
驚鴉叫軋拉寡鵠為之愁昏燈斂寒燄斜月睨高樓  
露涼泣百草湛湛珠淚浮寒帷不能寐援琴寫我憂  
天空太古心知音將誰求莫謂知者寡古調今烏儔

由桃源澗至破山寺

和風淡微雲寥廓天宇霽葛巾出城市二三子連袂  
青青繞郭山濯濯靚粧髻披榛覓覺路樹石相蒙蔽  
竹杖撲荒烟芒履穿利剝盤旋蟻緣磨曠蕩猿脫繫  
古寺隱深林椽桷齊梁制微薰爐烟裊過耳松濤細  
石罅嵌迴廊簾影節輕翳靈臺積塵垢聖果無根蒂  
久坐暗室明出戶斜陽逝新筍臙睛粉破土膚凝脆  
疏花暈殘脂帶雨淚盈睇老僧出山去花竹皆闕閉  
惟餘嵐翠色任人拾與棄明月照潭底白雲宿簷際  
入山即出山山鬼莫為厲

登三峯寺

秋深幽興愜結伴叩禪闈細草通曲徑疏林漏遠山  
濤聲驅海近幢影逼僧閒何日息塵鞅白雲相往還

秋晚登觀音洞松岩

岩上出丹砂色最艷

暝色帶羣嶂陰陰蒼翠凝海雲徐吐月野渡遠移燈  
綠鬢雕難保丹砂煉未能昏鴉寒又噪穩宿萬松層

虞山餞張介夫陳石齋赴京口

涼蟬疏柳噪斜陽寶瑟紅牙憇別觴夜月滄江瓜步  
白秋林楓葉破山黃張帆明日東西水剪燭寒齋上  
下床欲採芙蓉贈幽怨霜清七泖不成行

宿破山寺

幽巖忽暝色松竹斂餘青  
夜壑延空籟香燈暗佛形  
團蒲身外影斗酒醉中醒  
塵界勞生久微鐘近曉聽

讀黃霸傳

車蓋行春一丈高  
緹油特賜聖恩饒  
循良事業分明在  
種樹耕桑太守勞

救虎閣同仲若夜坐

空林秋雨夕清話  
玉杯凝澗水餘龍氣  
山魃闕佛燈論文弱  
弟健問夜睡童鷹不覺  
鐘魚動窗高海日昇

三峯寺雷雨

漏遙久立蒼苔露華冷下簾一炷篆烟消

行春

檢點春衣薄招尋野屐聯花明玉珮側柳拂錦鞍前  
喚渡邀歌扇登樓簇舞筵艷陽能幾日加倍惜流年

晚登金山

海風吹上月輪圓渺渺秋波盪晚烟掣電樓船通島  
國凌雲殿閣壯江天鼃鼉宅逼名泉沒龍象門高寶  
帶傳更有芳徽巾幗遠親持桴鼓萬軍前

雨後過京口

佛狸祠下晚潮生瘞鶴峯頭暮雨晴巖角微陰鐵甕



神似漁洋  
方評

幽秀方評

暗江心殘照石帆明  
府兵昔重南徐鎮  
海市今移北固城  
舉酒漫誇天塹險  
蜃樓噓出與雲平

夜行丹陽道中

曲阿不肯泊晚色  
晉陵微小市摸魚  
渡輕帆落雁磯  
人烟疏傍水秋月  
冷侵扉柔櫓經行  
處沙鳧拍拍飛  
李特庭自江右赴  
成都得書已抵岳  
陽

烟水碧茫茫高風  
渡岳陽帆收彭蠡  
雨衣染洞庭霜  
戎馬櫻秋興征鴻  
帶夕涼緘書懷李  
白試訪浣花堂  
贈人

小別滄桑類轉波  
美人凝睇下銀河  
褰簾省識潘安

多韵與黃仲

則似此星辰

非昨夜為誰

風露立中宵

丰神酷肖

確士評

鬢對酒重詢碧玉歌舊日湖山春夢闊今宵風露晚

尊多蛾眉也有青衫感明月琵琶喚奈何

友人携妓泛舟偕游五里湖夜深始歸

芙蓉露重落寒蕊  
偎頸鴛鴦睡不起  
蘭橈搖曳動簾  
波雲鬟霧鬢參差是  
唱罷玲瓏玉簫冷  
喁喁私語不  
盈耳兼葭帶月籠  
渚宮鴻雁驚霜叫  
秋水遠游歲月  
去如電老大風情  
薄逾紙山温水賸  
滯蛟龍酒綠燈  
紅困紈綺闊疏自  
誤亦有命苦樂相  
尋乃其理年來  
故里夏多蜚天末  
美人札滯鯉明珠  
竟老伏波翁黃  
金誰鑄鷓夷子久  
習水戟鑿昆明何  
日王師縛阿里

灌夫罵座未為失是日有大祀人憂天究誰使夜闌

聞柝疑夢寐錫麓塔尖佛燄紫元稹有苦樂相倚曲云苦樂相尋晝夜間

燈光那得天明在

### 秋夜懷人

芳草萋已晚美人期不來携琴掃蘿徑明月照蒼苔

桂樹涼飈發秋河落酒杯西堂詩思迴孤影傍寒梅

### 晚登阜民臺

在且園後無錫舊署相傳為周公瑾故第

秋飈忽送雁來聲閉閣登臺落日明九疊雲山醒睡

眼萬家烟火暖寒城大名開府周郎第小築藏書晏

子楹顧曲風流久銷歇畫船隔水尚聞箏

虎邱虎邱唐宋以來向稱繁華庚申亂後荒廢不治游人或病焉余與仲弟獨愛其山骨

奇秀較樓閣遍山時更勝焉

秋風起將夕林泉被黃葉涼棚豁竹院團扇收  
山塘宜載酒花市偶停楫海湧富邱壑朋從聯步屨  
腐草號寒蟲雜花鬧游蝶微徑入确犖重岡闕交接  
塚顏無虎卧澗黑聞魚喋石頑說不靈字大榻為帖  
較東坡作殆有過之  
確士

魯公大字泉名噴我慙劍氣令人懾笙歌山鬼泣鐘刻石

磬天魔攝青山厭羅綺白塢支瓦堞僧老破衲衣龕  
荒蝕經牒刮仄冷幽壑霸迹銷艷妾青青支硎嶺水  
蘇洞庭涉橋長尚鱸膾苑廢誰犬獵斜日難久留高

結語似鑄  
鐵方評

踪將安躡倦游思小隱勇退乃大俠

送王遜齋太守還鄉時在錫山署內

蓉湖消夏盡輕舟金管銀箏水上頭  
今夕孤篷楊柳岸晉陵烟月冷如秋

青草春寒新漲遲片帆渺渺去何之  
携筇北固登樓日第一江山定有詩

每說西湖興未降也思七泖泛烟艫  
無端鼓角連滄海驚折游山屐齒雙

榆林燈火擁寒氊老去鬚眉已皓然  
擊碎唾壺吹裂笛王郎壯采似當年

離觴累舉酒將酣去住心情總不堪昨夜梁溪春水

長送君雙槳過淮南

歸計我無陽羨宅有資莫買沃州山豐湖南去幽棲

好尋著桃源莫便還

有買山結鄰之約

由崑山夜行至黃渡

玉山燈火遠黃渡夢魂遙殘暑收微雨輕帆趁晚潮  
竹竿風裊裊菰葉水瀟瀟明月隨船住烟深不過橋

偶作示仲若

學文太門徑多百派注滄海靈心窮怪變故步今必改  
為人理則殊一道達萬載歧途毫釐間荆棘生軒墀

方評

所以古先民執一為之宰義利辨諸心有如花破蕾  
仕以行其志清風宣蘭茝泫泫山下泉池池遞縈匯  
汙渠一引貫味混俎中醢源頭苦不清到海濁仍洩  
擾擾人欲中險於石作礫

晚晴偕吳總戎登第一江山

江上青山放晚晴旌旗明滅潤州城龍歸滄海雲無  
主馬蹴寒沙月有聲樓櫓頻年籌北顧 詔書昨日  
罷南征且携斗酒銅琶去很石秋來草又平

白秋海棠

珍重瑤階軟玉枝素心深悶不嫌遲神交仙浦遺珠

後是花惟水仙淚盡幽閨罷織時艷絕由來超色相

可以作配

香多惟恐損芳姿霜濃月淡渾無語腸斷西風有所

思

破山寺夜雨

雷轟電掣雨模糊風竹撼窓聲氣粗夜半龍吟山忽  
破萬松明滅一燈孤

過王處士山莊

竹樹茅茨帶短垣投閒到處有桃源淵明松菊猶開  
徑仲蔚蓬蒿幾閉門天外樓船鳴鼓角山中蕙帳夢  
羲軒廿年大有南村興琴鶴移來共曉昏



一分花柳一分田不事王侯亦枉然  
抱膝南陽長嘯日折腰彭澤賦歸年  
英豪出處無殊轍漢晉風流憶兩賢  
倘識冥鴻翔舉意何須清濁問山泉

破山寺晚眺

破山諸作清  
澈出秀嗣響  
王孟常尉在  
前庶無愧色

薄暮山門立微陽淡遠岑林高藏晚磬溪長沒寒砧  
缺月松巖上暝烟竹徑深幽棲能幾日每羨倦飛禽

夜至破山寺訪潘漢老

缺月隱東海空林踏秋烟籐杖歷确葦寒蛩咽露團  
冥行得微徑緩步無躡顛泉聲響幽壑燈火出危闌  
小犬莫我吠主人最相憐入門溫尊酒青琴理朱絃

清詩沁肺腑苦茗消疾涎久讀本無書餘香留舊氈  
稍卷悲憫懷免為憂患端罇瓢有何樂試問孔與顏  
鳴鶴已警夜孤螢自往還空山容美睡明日泛琴川

草鞋峽夜泊

潮平風颯颯江暝雨霏霏遠火秦淮櫂微鐘燕子磯  
波深鷗意遠烽近雁飛稀昏黑聞笳鼓軍防等合圍

晚泊燕子磯

落日淹孤櫂荒涼烟水秋江山爭斷岫星月逐寒流  
久作蘭成客時膺杜甫憂况聞諸道急飛檄逼龍州

秦淮七夕

燈殘香盡不勝愁今夕何夕水上樓  
娉娉清歌聞子夜娟娟明月作中秋  
酒醒冰簟來鴻雁星簇銀河渡  
女牛羅扇流螢緣底事司勳夢不到揚州

過京口

揚子江頭初放櫂  
桂花香裏一啣杯  
鱸魚莼菜尋常味  
要看青山到海回

宿救虎閣

孤僧嫌寺僻  
獨客見禪心  
兩過龍歸澗  
風生虎出林  
鐘殘依枕斷  
星遠落潭深  
起坐天難曙  
空山閉積陰

九袞洲

九洑洲邊路風雲鬱不揚礮車支里柵箭鏃拾兵房  
上相龍蛇陣當年豺虎場豐功酬將帥誰酌國殤觴  
登北固樓時赴吳淞阻風  
倚欄目斷海天塵秋老風吹墊角巾萬馬聲騰三峽  
浪孤舟興逼五湖蕪狂瀾砥柱知何日很石英雄定  
有人太息江山形勝地暮鴉漁火起西津

石頭城秋夜感興

甲申九月

天半明河迥不流梧桐疏兩望中收邊書方急龍城  
戍遠客無端鳳嶺秋苦霧沈江漁火暗亂山繞郭寺  
鐘調床頭亦有劉琨劍夜夜寒芒射斗牛

風流跌宕感  
慨遙深韻響  
之高由於襟  
度之遠名作  
也方評

韻美乃如此  
方評

過采石磯送友赴湘南即解纜東歸

儘有澄江任掉舟問誰高詠敢登樓謫仙明月千杯

酒謝眺青山一葉秋客路蒼茫雁南向鄉心日夜水

東流詩人到此終塵土惟見烟波起白鷗

鶯脰湖

袖裏陰符字欲無垂虹小飲醉模糊蓬根清夢初回

後紅樹青山鶯脰湖

速老漢崑山不至

玉峰雲靄隼中有美人暉秋水長河濶蒼苔小院肥

重陽黃菊近諸弟白門歸應踐扁舟約無勞減帶圍

贈三峰藥龕和尚

芒鞋一著嶺雲開  
慣向幽棲破綠苔  
春雨茶烟分半榻  
秋風菊釀醉深杯  
樓觀曉日金雞唱  
松湧寒濤鐵騎來  
彷彿生公行道處  
探竒何必定蓬萊

同潘老漢游虞山

丹楓黃葉四山稠  
酒綠燈紅山更幽  
巖洞鐘聲散墟落  
海天秋氣逼僧樓  
靜參摩詰窮通理  
晚愛蒙莊汗漫游  
安得思君便著屐  
朝朝乘興到林邱

輓溫叔明師

白髮歸來老侍郎  
萬松手植壓平岡  
如今風雨化龍

似活翁方計

五言古詩

五言古詩

五言古詩

五言古詩

去松子紛々墜夕陽

夜至破山寺尋蓮航不過

寺有常尉五律六一翁且避之走向敢再

下筆常作寫清晨之景余特寫夜景耳

昏沈入古寺闕扉到禪堂深院曲通徑殘鐘殷在床

潭虛星欲落林靜月微涼隔牖時聞嗽頭陀病閉房

又一病僧非蓮航也

重九破山寺登高即寄舍弟錫山

秋水槩川一權長巖扉松徑未全荒欣逢好友聯肩  
肘遠見平田熟稻梁初日高林唐古寺黃花白酒晉  
重陽諸昆應作茱萸會九隴青山勝故鄉

沈石田秋林讀書圖 又名讀易圖

終年著書無一字終日閉門無一事入山蹤跡深復  
深紅葉黃葉秋滿林伊誰好事繪此景石田老筆入  
佳境古崖羣峭摩天空前巖飛瀑後巖楓中間老屋  
黃茅結短髮當窓書半摺不知窮究何根由儼握大  
象神孤游眼前卷軸糟粕耳風動月臺搜逸史遲遲  
童子負書歸畧約一條橫翠微主人高詠急需汝惆  
悵斜陽奈何許青氎曩歲依破山巖扉松徑慵開闕  
涼蟬高柳咽欲歇侵曉疏燈續殘月安得畫禪筆底  
清風徐長教秋聲樹聲夜入歐陽廬



喜雨招老漢夜酌

久旱天初雨，輕陰晚更雷。  
浮雲忘去住，逝水故滌洄。  
雀啄拋紅豆，蝸涎帶綠苔。  
呼童勤滌盥，老友夜應來。

雲起樓晚眺

高閣留殘照，西風開晚晴。  
溪明新月上，山暗遠烟生。  
密網江湖意，疏砧邊塞聲。  
清秋櫻萬感，空闊若為情。

晚至破山寺

黃昏山路不知遠，傍水穿林到寺門。  
清磬一聲雲外落，小樓燈火出松根。

三峰寺留別藥菴

興象絕妙  
方評

自然入妙  
方評

曉日松篁一徑幽  
籃輿重上遠公樓  
山花山鳥經年別  
兩脚紅塵萬斛愁

紺宇琳宮隔世氛  
鸞綾簞錦戒香重  
匆匆一棹梁溪去  
十里青山半白雲

鄧尉觀梅

春風一夜洞庭回  
萬樹梅花似雪開  
折得瓊瑤無寄處  
滿天明月鶴飛來

雄縣道中

連年水災

雲水蒼茫夕照餘  
幾行衰柳不成墟  
高臺烽靖兜鈴落  
老屋烟荒鹿眼疏  
堠吏親人如僕隸  
湖鄉生計僅

樵漁今宵片席分  
鷗鳥霜重畦殘  
摘晚蔬

臘月津門卧病  
桐鄉君自京邸至

晴雪寒簾照鏡臺  
釧釵聲逐曉風來  
襟留京國緇塵  
暗車走營門畫角  
哀白傅難居珠米  
貴文園卧病玉梅  
開椒花柏酒紛相  
向冀北春從日下  
回

夜飲歸感事

倒屣華筵丰列卿  
寒酸今嚼大官羹  
九霄風露爭秋  
至竟夕星河入座  
明美酒平津酣夜  
宴禁錢少府困  
邊征甘泉武畧縣  
宵旰李廣應除右  
北平

初有東三省  
經畧之

議

送吳石臣孝廉自京師入洛

昔聞倦翼鳥歸林，薄笨車懸爨尾琴。  
春酌每淹清夜話，秋風不冷遠游心。  
中原河決紆籌策，上谷兵興費賜金。  
玉几憂勤方損膳，莫因懷刺怨升沈。

送王向甫侍御同年出守潯州

二首

楊柳東風御陌晴，一麾詔出鳳凰城。  
烏臺舊壓三司貴，蠻府新成萬里行。  
北海壺觴紛祖帳，南天鼓角罷邊聲。  
使君襟抱如冰玉，一到潯江分外清。

鯨鯉波平封事少，明光仗馬噤無譁。  
雲霄未盡憂天草，雞犬同携泛海楂。  
高爵他年閩內賞，好山終古鬱

林斜此邦藥物醫衰蹇

用芝麓尚書句

老桂香生問俗車

送吳綺疏還吳

御溝垂柳起霜風一片清礎繞漢宮  
山色雲連三輔遠雁聲秋帶九邊雄  
萍開潞水窺明鏡莼老吳淞繫短篷  
為憶夢回楓葉岸晚烟殘月蘄門東

寄京口李慎之

春風一醉不能醒瞥見楊花化作萍  
誰識歲星藏曼倩故應酒德頌劉伶  
佛狸祠古江湖惡黃鵠峰高海雨腥  
記否扁舟牛渚夜滿天霞綺萬山青

寄張介夫

風格高古

方評

高館多梧桐蕭蕭連夜雨涼颼入羅幃竟夕無人語  
輾轉不能寐百蟲亂更鼓伏枕念所歡美人豈終古  
曉起欲從之泥深陷車輔超超歧路側草露濕鞵屨  
行行臨斷岫秋水寒沒股悵望蘆中人日暮無鳴舫  
北風莽蕭瑟微雪墮極浦慨然返故閭長歌守環堵

夜來香

曲江宴後過平康遺事風流說盛唐笑我簪花殊寂寞  
冥玉人新贈夜來香

秋夜宿天甯寺送陳鹿笙太守赴杭州

排雲冠蓋盛東華叔度新傳入洛車濁酒樽開秋月

雄韻一耕伸  
縮歎薄深得  
杜法解此者  
罕肯堂

滿清譚簾捲桂枝斜蟠胸竒正藏兵甲撥腕縱橫走  
墨花匹馬青城門外路行旌為我住僧家

循聲鼎鼎動山公元宰兒孫自不同名帖崢嶸 宮  
柱上離懷牢落酒杯中朝來壓菊霜華重到日驚潮  
鐵弩雄春水生時定相訪六橋立盡柳絲風

贈劉竹溪老人

晨起閒臨快雪書醉餘午睡眼模糊人間屏幃都題  
徧為種芭蕉五百株

吳船集

卷終

吳船集卷終

吳船集卷終

吳船集卷終

吳船集卷終

吳船集卷終

吳船集卷終

吳船集卷終

吳船集上卷終

吳船集上卷終

三



睫闇詩鈔卷二

吳船集下卷

霍邱裴景福伯謙著

嶺南金保福受荃書

皂莢莊

水南水北盡垂楊  
細路平田皂莢莊  
誰起危樓半霄漢  
漢玉人紅袖倚斜陽

紅橋晚別諸弟

又作紅橋別津門  
兩度春夕陽  
鴉背影行色  
馬蹄塵小聚  
忘為客相期  
各愛身聯床  
今宿話憶否  
遠游人

春色迴天地揚鞭向帝闈晚寒頻酌酒薄宦久離  
親踏月長安市烹泉慧水濱片雲來海上仰望意逡  
巡

吳下逢友人夜話

盧龍一去夢魂遙烟柳斜陽寶帶橋客久邊霜彫綠  
鬢看夜涼斗酒動春潮扁舟况泛西施去好月誰將庾  
亮邀君意浮家洞庭上倦遊吾亦羨漁樵

蜘蛛

青桑飼眠蠶蜘蛛吸風露露涼桑葉稀各有經綸具  
衣被天下暖束縛不自顧區區飽口腹張網如織素

風騷諷諭之  
遺音於以見  
作者天懷高

遠矣方評

網成瞰其隙自投不待捕謀生有巧拙於物孰好惡  
吁嗟爾蜘蛛雷電鬼神怒

崑山道中望虞山

隱隱青山一角斜翠微深處記移家三峯日觀吞滄  
海七泖風颿勝若耶拂水巖空紅豆冷維摩寺古白  
雲遮何年更入桃源澗分與隣翁掃落花

申江春夜餞黃漱蘭師

洞簫高閣破春寒珠斗明河迴夜闌一代通儒無漢  
宋中朝大事有歐韓龍門峻極黃流匯麟史修成絳  
蠟殘况有鳳毛能濟美玉堂家世古今難

雨後出郭

熱至渾宜雨風來又放晴孤雲無定相時鳥有新聲  
柳重溪橋暗花深縣郭明至今迷出處敢與白鷗盟  
周弼臣大令招張怡亭廣文偕游虞山晚宿趙

山人園

櫻桃墜雨紅珊瑚麥苗翻風綠甌瓠幽人閉門日高  
卧但聞鳩鵲相追呼白頭使君厭官府緹油皂蓋偶  
來駐驚鷗冲破一溪雲渴虹下飲千峰雨廣文先生  
今詩人錦囊驢背隨吟身清齋一月三十日蔓菁首  
宿蒿芽新使君好客不知老逢人大醉披懷抱梁月

大蘇勝境  
方評

斜照酒杯乾  
簷花落盡  
春星曉  
客散園空  
晝掩闥東  
風吹絮白  
於棉行人  
回首破山寺  
古木斜陽帶晚烟  
久客江南病起偶作

天半孤雲出岫遲  
滄江波冷老龍知  
文園卧病淹秋  
兩潘兵閒居  
驗鬢絲萬事風塵同  
轉燭扁舟烟月偶  
尋詩含毫擬續  
遂初賦湖海蒼  
茫曷所之

夢繞觚稜傍日邊  
陸沈粉署自年年  
為郎未應張騫  
募言事誰知主父  
賢攬鏡行藏天寶  
後登樓憂樂洞  
庭前杞人更抱  
愚公願篋草頓  
焚又幾篇

家君宰無錫於己卯春闈舊廨荒地起書舍植

及覆沈吟杜  
子美范希文  
如遇之目前  
也方評

竹樹命予兄弟讀書其中榜曰且園至今十  
載幾視若室家焉偶賦四律

數畝顏垣碧蘚滋  
誅茅不費買隣資  
小園眼底蘭成賦  
廣廈胸中杜甫詩  
綠水三篙通畫舫  
青山一角補疏籬  
伯鸞廡在無人賃  
終古梁溪却賦誰

城高時聽子游絃  
牆短差齊賜也肩  
爐火泛笙宵煮茗  
簟紋潑水午貪眠  
北塘鷗鷺渾相識  
青鬢江湖又幾年  
繞屋龍孫今十萬  
携鋤親乞聖門前

園中斑竹俱自學宮

移得初種不及  
十竿今滿林矣

雲山四望接天長  
高卧江東一草堂  
春水扁舟通虎

阜秋風遠宦近鱸鄉論書雅契潘邠老合藥時邀費

長房最喜聯床聽雨後曉來晴翠滿池塘

上海為松江府屬邑

淮山數點隔江明懶賦歸與似不情三徑菊松尊酒  
在五湖烟水釣竿輕謝安絲竹悶哀樂坡老親朋問  
死生為想將離重惆悵梅花香雪撲簾旌

劉芝田中丞出使英法還朝授廣東巡撫行

至上海盛暑賞假一月入覲將行賦贈

海平風不動纖蘿星使靈楂傍日過天馬僮來渥注  
水壘書將問越王佗久聞潞國驚丹使今見張騫下  
絳河官閣昔饒尊酒誼鯁生弱歲醉顏醜

踏徧歸墟大壑山樓船明月映刀環  
竭來推結開王會收盡圖書返漢關  
北海鯤鵬當夏息南天節鉞盼朝還  
似聞宣室虛前席坐鎮無人控百蠻

冠劍傳呼對通英廟謨深遠豈論兵  
將軍首藉紛

移種都尉莎車久課耕百粵江山連  
嶺嶠三韓門戶

拱遼京

自互市後防海籌邊屢勞廟算而越南  
朝鮮邊患日亟固圍之計莫切於此矣

膝陳自有匡時略賭墅由來負盛名

郎官青鬢不勝篋載酒江城慣聽鸞愛日  
忍離堂上下閒雲莫問嶺東西憂時誰識  
長沙少待駕將為伯樂嘶畫戟風清車  
轍簡鳴蟬忽送綠楊隄



曇雲大師 兼通丹汞之術

石當鍊後天能補灰已燒餘却未終點水長空原有  
雁印泥殘雪本無鴻黃金散盡霜鬢白丹鼎融成露  
掌紅道書丹至五莫向嫦娥乞大藥月明碧海恨難  
窮紀實

白門感舊

胭脂巷口曉鶯聲十九年前玉勒行呼酒捲殘丁字  
箔尋詩踏破石頭城蔣山春草留香徑崔護桃花刺  
落英一曲清溪寒似鏡重来江令不勝情

漁父

寄託遙深

韵短意長

方評

清峻蒼涼  
方評

秋雲障日將成雨春水因風陡作波湖上漁翁不解  
事賣魚沽酒醉顏酡

蓮華待月圖庚辰秋宣武門南蓮花寺作也復

題一絕

搗芷揉蘭起夕重瓊瑰心事劇殷勤張琴訴與天邊  
月碧海沈沈半碧雲

贈吳蒼碩

三年花月住江城蜃市樓臺照眼明永夜角歌慳薄  
宦寥天鶴唳有同聲摩挲藝鼎逃秦火險勁詩篇敵  
楚兵薦士昌黎今寂寞孟郊名不滿公卿

蒼碩畫梅花

新詩百鍊沁心脾  
餘技猶堪作畫師  
橫掃青籐凌日觀  
繭箋水墨和胭脂

寄桐鄉君

曲巷濃陰隱畫樓  
九龍黛色上簾鉤  
携來團扇蓉湖月  
涼到羅衣范蠡舟  
南浦垂楊牽別緒  
西園芳草戀春愁  
至今陌上花成錦  
應見輕裝駕碧油

英雄風致  
方評

屈戌文窗掩碧銷  
驚鴻同度赤欄橋  
月移花影侵銅鬢  
風勒江聲咽玉簫  
客久看殘燕地雪  
夜涼話動廣陵潮  
蓉湖便是明河水  
閒却楊枝舊舞腰

崑山城外夜泊

風色驛亭晚炊烟崑麓晴扁舟天上坐攤飯月中行  
蠓大明深港漁歌起近城過橋樓影直繫纜碧波平

重九夜宿蘆涇港舟中

萬里江河流蕩蕩百年歲月意駸駸海門潮汐催昏  
曉京口雲山變古今皂帽崢嶸塵土暗羅衫重疊酒  
痕深孤舟夜雨青楓岸叢菊荒園何處尋

狼山晚潮

疾雨驅殘日寒潮走怒雷雲移孤塔動海擁五峰回  
一氣連昏曉狂瀾任去來竟無障川手強弩浪花催

天地孤舟萬  
象吐納蒼波  
野水有龍吟  
馬方評

晚登狼山支雲塔

五峰高處躡丹梯  
落日蒼茫萬象迷  
京口西連天塹  
遠海門東去地球低  
叫閣可有巫陽下  
窺戶將於北斗齊  
鐘磬上方催整駕  
近城燈火夜烏棲

石城夜泛

聯翩裙屐出西州  
作達翻為秉燭游  
急檣劃潮魚躍  
月空江吹笛雁驚  
秋蘭成身世餘詞賦  
典午河山有  
戍樓咫尺莫愁好  
烟水吾徒容易得扁舟

秦淮聞歌二首

青燈秋雨細如毛  
斗帳樓懸一榻高  
何處琵琶悽欲

歇夜深猶唱鬱輪袍

年來腸斷吳娘曲  
移傍青溪水閣頭  
夢醒一聲何滿子  
夜潮西下石城流

宿蘆花港大風

鐵騎無端至  
雄邊蹴踏然  
長風激江水  
深夜攪孤眠  
月冷龍城戍  
烟荒雁澤田  
寒燈搖未已  
客思已如懸

遊狼山置酒準提菴贈小塊和尚

出郭垂楊接遠嵐  
上方殿閣蔚精藍  
獨留衣鉢傳龍象  
小集簪裾話酒柑  
撼海風濤杯掌動  
極天帆鳥鏡奩  
涵餐霞慧遠如開社  
日夕來同彌勒龕

警句中神  
韻獨遠方評

八  
夕  
日  
去  
惡  
先  
生  
遣  
蔭  
姪  
送  
詩  
謝  
蘭  
花  
之  
贈  
賦

七夕日去惡先生遣蔭姪送詩謝蘭花之贈賦

此作答

簾犀微動午風遲  
投鼻苓床讀楚詞  
小阮褰帷傳妙句  
后山空谷寄相思

黃磁斗貯亞  
闌低蟻穴輕探付  
小奚記得冰衙春日

暖竹兜親取子游泥

虞山子游墓旁泥  
宜種蘭名子游泥

江南消夏最清華  
簇向紅樓鬢角斜  
天塹明河今悵望  
膽瓶一嗅素心花

登狼山望海即送劉仲賢姻丈之官湖南

五峰天作障東瀛  
誰遣鯨鯢鼓浪行  
互市帆樯未萬

里當筵杯酌亦三生青山如勸勞人駕碧海難禁恨  
鳥情早晚沅湘霖雨徧閒雲猶傍大江橫

登北固

酒酣登北固莽莽萬山秋惆悵孫劉去滄江日夜流

京口晚望

大江東去萬山晴黃鵠峰頭載酒行暮色蒼然來海  
上二分明月是蕪城

游焦山

岷源萬里走雷霆鑿破巫山匯洞庭一任橫流將到  
海截江孤柱插天青

豈徒一代詩  
人已耶方評



山中有人在  
方評

曉日扶桑照海門朝宗東去浪花奔黃河碣石差肩  
並十萬峰巒讓一尊

佛閣僧寮曙色新芒鞋踏起海天塵椒山合佔焦山

席第一江山大有人

焦隱菴祀楊椒山先生

花外峰青江影黃玉人畫舫映垂楊譙樓鼓角中流

起如此名山亦戰場

焦山東麓新築磯台

天涯鴻雪半吳頭兩度來尋慧遠遊惆悵文昌今宿

草江山風月怕登樓

癸酉秋與詩人張介夫同游

蒜巖瓜渚一江分海岳菴前日欲曛倘與春山鬥眉

媿蓬窗螺黛有文君

澄江舟次別桐鄉君至金陵

玉簫銀燭漸生寒  
清夜孤舟月一丸  
戰壘沿江潮噉  
盡漁燈傍岫浪搖  
殘嬌鶯解語憐  
文祿曉雁驚風惜  
羽翰指點栖霞青  
斷處舊游此去問  
龍盤

偕友出郊小飲

羶醅心情孰與論  
筇枝烏帽出東門  
桃花漲暖魚將子  
楊柳陰濃犢有孫  
萬頃稻田都傍水  
一灣竹嶼自成村  
非材位置宜間散  
暢好風光到酒樽

寄蒼碩即速紫琅之遊

無端風湧海潮音  
入世蛾眉謠咏深  
貝錦明珠騰口

摩詰詩中畫  
意多此詩句  
尤會造化方評

說青天白日鑿胸襟登山曾約黃花酒買隱將尋桂  
樹林篋衍零星蛛絡稿涼秋團扇寄微吟

觀上海機器製造局

世變不可遏天心亟霸王足食始足兵其要先選將  
約束心手背持挺天下壯西法入中土黃金聘大匠  
洪爐聲隆隆風輪自磨盪萬機逐之發極盡殺人狀  
度索走飛電削鐵化腐醬霹靂金石摧孫吳膽盡喪  
技窮式屢新巧極拙為上巧與巧相遇公輸晁師曠  
利器付孱卒有恃心乃放沈舟背水時肉薄抵甲杖  
廟謨慎防海金錢擲鉅浪縛嬰敵秋濤飛鬣速春嶂

兵氣久不藏大農勞饋餉儲材若邱山用之反受創  
赫赫衛霍功威稜孰敢抗

夜過蓉湖聞歌

時方後  
家無錫

秋風一夕起蓉湖好夢驚回舊酒徒鷓舸何人似西  
子鹿門今日在東吳當筵顧曲心情減隔水聞歌夜  
月孤細數十年游俠地九龍青翠不能無

蓉湖晚泛

珠箔明燈照畫船荷香風起欲涼天青衫慣載江湖  
酒白仁新翻樂府篇錦綺年華隨逝水婵娟心事動  
離筵寓公今作蓉湖主携鶴重来破晚煙

出遠

澄淡而秀異  
方評

泛太湖泊項王廟

在五里湖

偈促不稱意孤舟入杳冥樹凋迂老閣風勁霸王廳  
秋水渺然碧亂山相向青問誰同載酒終日此揚舲  
自滬旋通即送陳去老還懷遠二首

疏林一塔識層城霄漢奇雲耀日明十月陽春晴更  
好五峰翠黛曉來生高塞湖海元龍氣倦聽閩河早  
雁聲江上潮平歸櫂穩離筵叢菊醉霜英

白門秋好誦君詩太息高文舊數奇饑餓恥將囊粟  
較功名休說負薪遲還鄉歲月消耕釣垂老行藏謝  
策龜木落淮山青未了引余歸興掛帆時

清明

連朝歌管沸江城十里樓臺盡曉鶯忽見飛花狂似  
雪天涯昨日過清明

過天津上合肥相國 二首

湖海殷憂一木支漢興重憶武皇時頻開東閣延嚴  
助遠使西夷過月氏瓠子歌成魚弗鬱上林幣盡鹿  
無皮甘泉英畧空前古應有功名衛霍奇

籌邊樓起海雲屯鎖鑰安危重北門漫詡奇功傳介  
子每思偉略趙翁孫艱難謀國擎孤掌謠詠隨身仗  
至尊哀樂年來同謝傅幾曾絲竹到清尊

公年來屢  
有期功之

憂余壬辰春由通州赴天津謁公面陳此詩公誦  
至尊韻一聯一再諷詠為之慨嘆遂命侍者送豐潤  
學士處及退至于晦若  
室豐潤來晤亦稱之

### 東豐潤學士

玉堂諫草動觚稜一掌橫流障未能鳴鳳每驚排仗  
馬伏鸞終作負天鵬蒼生自昔思安石青坂何年得  
杜陵聞說閉門心似水鬢絲憂國漸霜增

### 登金山寺觀江邊釣者

蘆花秋色上吟髭浮玉樓臺晚照時山徑雲埋遊屐  
少江天風定去帆遲投竿豈意連鯨鱣入夢何人類  
虎羆漫著羊裘向滄海驚飈吹斷釣鉤絲

秋夜京口舟中送人渡海

銅荷高燼燭花堆江海潮寒到酒杯醉裏不知歌管  
散月明鴻雁叫霜來

殷秋樵鴻臚隨 扈自東陵歸並談過獵之樂

六龍出塞上 陵歸侍從威儀駟牡駢大漠風雲

秋慘淡周廬星斗夜光輝控弦月滿蒼鷹瘦呼酒霜  
高紫螿肥始信鄒枚詞賦手短纓匹馬射朝暈

吳彥復座上晤曇雲大師

大師心中即是佛鏡臺澄照光明燭大師目中却無  
佛飲酒且食花猪肉捲衲帶得巫峽雲放杖劃斷匡

壯采寒芒揮  
斥八極



廬瀑蓬萊弱水不可到金山焦山看脩竹延陵公子  
本將種匹馬過江厭凡俗登筵絲竹撥閒愁卧閣湖  
山饜清福偶然買笑揮千金亦為尋僧憇三宿海岳  
菴前秋月好萬里江聲來西蜀師也幅中一笑迎天  
邊白鶴驂黃鵠嗟予南遊墮世網醉夢顛倒紛馳逐  
但隨饑鼠偷太倉未傍木魚噉晚粥坐令桂樹老巖  
阿蟪蛄春草驚何速被髮尋師入武當飽飯黃精採  
芝菊

秋夕漫興

倚枕榮枯孰重輕當軒風月自清瑩悟餘止水心彌

三句佛四

句儒

定看盡浮雲眼倍明積欠尚逋惟酒債屢攻難破是  
書城生天成佛支離事何論悠悠後代名

夜發京口

夜發南徐孤月涼海雲江樹兩茫茫萬檣燈火浮瓜  
步一夕風輪達建康城闕晴開鐘阜日寺鐘曉度翠  
微霜烏衣門巷重來燕忍見巢痕掃畫梁

翠微亭在清涼山頂

大雪宴徐園贈園主人

邃閣靜無塵重簾暖似春酒添詩力量梅戰雪精神  
寶鼎騰香霧鳴箏落錦裯主人能愛客歌舞夜連晨

劉省三中丞乞退南歸四首

中令勳名草木知，鯁生馬下拜公遲。  
艱難孤掌籌邊日，談笑中原滅賊時。  
鹿耳門高無惡浪，鱸魚鄉近有歸期。  
平泉暫傍青溪築，六代江山共賭碁。

鯨鯢鼓浪海天孤，南顧長城帝曰俞。  
事急邊功思衛霍，時清文法困孫吳。

扁舟范蠡金應鑄，痛哭長沙淚欲枯。

公為目疾乞歸龍性由來馴不得，江湖浩蕩白鷗俱。

二十四史搜尋徧，人物如公抗座難。  
帝錫弓弧清

海甸，天留將帥鎮騷壇。  
公詩格極佳，久有刻本，曾文正作序。問年奇福

優公瑾，望眼蒼生屬謝安。  
玉几憂勤心，警少東山

風月幾盤桓

間雲欲雨捲難舒滿眼青山未賦初窮鳥竟蒙掘羅  
網卧龍今見伴樵漁黃河北上瞻樞密夷使南來問  
起居爭奈烽烟侵屐齒希文後樂近何如

泊胥門

三月三日春水生扁舟直下闔閭城桃花如雪胥江  
上十里紅樓燕子聲

謁明孝陵金陵鍾山之麓

十年帝業掃羣雄濠上真人泗水同終古江山餘王  
氣至今龍虎閔幽宮玉衣夜舞昭陵匣石馬秋嘶漢  
苑風北燕飛來遺恨在文孫何處墮髯弓

鸚鵡學詩圖

鯤化鵬飛會有時九天雲海逞雄姿  
却憐紅背矜明慧移入雕籠猶費辭

泉

山根巖罅瀉涓涓激石縈林下  
野田纔入平湖清濁混因風捲浪便滔天

泊揚子江

天生江水向東流誰遣孤篷海盡頭  
燈火夜迷瓜步市風雲曉入蒜山樓  
銅琶鐵板英雄恨楓葉荻花烟  
景秋極目蓬壺何處是壯心牢落付沙鷗

渡江

出險難思議臨流悖往年蛟龍孤擢得雷雨萬峰懸  
不涉江湖惡馬知隴畝賢予生仗忠信履薄愧拳拳

宿三峰寺簡藥龕和尚

時家君罷官從游虞山

天半翛然鸞鶴羣相從清曉到斜曛佛燈難度飛蛾  
刮法雨能消野馬氛遠壑霜鐘敲夜月空林水碓搗  
寒雲香銷漏盡蒲團在滿院木樨何處聞

再到破山寺留別蓮航和尚

救虎閣中山色好籃輿芒屨費招尋千章夏木森帷  
幄百折幽泉碎筑琴龍喜安禪馴故壑鳥知悅性戀

空林小樓果踐聯床約夜雨寒燈耐苦吟

兩宿楓橋

欲放梁溪權先呼木瀆船流光擊處碎清夢盪成圓  
楓葉山塘路蘋花水郭田柁樓暝雨裏孤枕傍愁眠

山居秋晚喜故人至

青邱勝境

淡永方評

微雨黯將夕殘陽翳西嶺空濛山翠中青笠紅衫影  
故人湖海去浮沈飄斷梗握手一大笑霜鬢長過領  
開我南軒門拂我東林枕松竹鳴戛戛簾幙秋風緊  
漉酒脫巾網取魚喚筇箸晚菘霜露餘小園生意冷  
回首十年別羊胛熟俄頃縱談忽太息怒髮衝冠猛

結語坏土障  
黃流激昂婦  
於蘊藉肯堂

推手遽止之有酒但須飲

晚宿三峰寺

家有青山不論錢逢山何事輒留連  
空林水石渾如畫斜日村墟半化烟  
燈暗流螢深竹裏鐘喧宿鳥亂  
松邊何年結得芝薇伴布襪芒鞋便是仙

送朱榛山師回里

魯靈光殿自巍然吳楚橫經路幾千  
吾道狂瀾將到海高秋短櫂竟歸田  
江湖白髮青氈在桑梓新陰舊  
學傳獨我魂消大槐阪廿年風雨夜燈前

送內子還鄉夜宿丹陽拈得蒿字韻



布帛并粟之  
言、有盡而  
意無窮方評

大悲慈心最  
為詩家上乘  
杜公往、有  
此方評

歲晚無家別離情付濁醪燈殘秋角曉潮湧月輪高  
甕少蘭成麥門盈仲蔚蒿家風裙布慣井臼莫辭勞  
曉色動行櫂西風一夜涼蒲帆落青草楓葉下丹陽  
兒女催年老江淮怯路長老親方北渡未敢說還鄉  
且園梅開索者接踵為賦此詩

年年驛使到江城無限相思寄遠征玉蕊幾株風雪  
裏一枝著手不勝情

荒園百卉盡摧殘雪裏能花亦大難留與東皇作春  
色莫教三折鶴心酸

家君於辛卯秋罷官僕從紛散其留者三四人

均老弱無所歸 家君亦為之擇善地焉  
匆 匆北渡感而賦此

兩行官燭畫堂中 白袷颺輕帽影紅  
春夢乍醒秋色冷 向陽畢竟羨飛鴻

十年蔬粥儘相隨 臨別依依去轉遲  
等是身家溫飽念 登場應有再來時

曉起

雄雞喔喔叫空庭 曉旭光分透綺櫺  
白鷺衝開新漲碧 朱霞劃斷遠峰青  
砌花露重嬌含淚 水荇風微漾帶腥  
多少紅樓春睡美 香溫翠被夢難醒

僕最愛此種  
所謂真詩也  
即小以見大  
方評

白桃花二首

紅紫叢中見一枝  
水精簾影隔相思  
還家漁父看雲  
候去國息媿含淚時  
玉燕輕翻朝雨怯  
銀蟾微照晚  
烟疑銷魂等是春風面  
別有風流淡宕姿

生小姿容醜雪花  
月明影傍竹邊斜  
于歸之子顏如玉  
垂老王姬鬢已華  
人面難逢因戒酒  
春心太艷不宜家  
東風省識溪頭見  
鎮日無言祇浣紗

少年

少年意氣薄封侯  
中歲渾如不繫舟  
高會玉簫明月  
夜橫吹鐵笛  
大江秋貂裘換酒  
難成醉團扇禁風懶

上樓畢竟雄心何處是  
綠沈半段委塵浮

聞漱蘭師乞退

鴻文諫草蔚 中興太息江河障  
未能秋興莼鱸催 遠權後堂絲竹仗  
孤燈回天畢竟思元素  
鉤黨何曾到李膺  
濁酒一尊雙鬢白  
可憐忠憤尚馮陵

夜讀子美詩適見異星

杜老好苦吟  
悼歎遭時變  
胡塵暗河洛  
白骨陳陶戰  
天寒拾橡栗  
饑餓同谷縣  
峽猿叫秋晚  
聞者慘不怛  
而我所履異  
廟算金甌真將相  
共憂勤艱難回天  
眷中興三十年  
草木舒春向弱冠  
走上都謁 帝明

光殿歐韓喬嶽姿沈宋金閨彥時清多暇豫文酒極  
歡讌縹緲蓬萊峰絳闕五雲見笙歌淹日月金碧起  
暝眩似聞崑崙駕日侍瑤池宴沈沈白獸闈微觸殷  
雷電深恐玉宇寒未雪先集霰野人背上暄馬敵長  
門扇中夜就枕席攬衣不待旦捫心究何事欲語又  
吞嚥長哦杜老詩攬槍睽睽見

晚步

沙岬輕陰動晚雷汀洲無限野花開行行欲採荃蘭  
去日暮碧雲期不來

新年過友

萬象回春後梅蘇柳帶晴  
斷雲含雨重殘雪漏山明  
蠹簡憂時略龍燈樂歲聲  
太平天下事鬱鬱獨何情

尋仙

弱水三千隔十洲朝霞暮靄隱瓊樓  
難從碧海求神藥再溯黃河問女牛  
雲錦鳳羅非赤縣寸田尺宅有丹邱  
分明結伴天台路麻飯桃花前度游

舉酒勸勒慎之還鄉

海枯石爛幾人存碧草春波屢斷魂  
客至開簾月照席曲終入座酒盈樽  
遠游王粲先成賦善病相如懶出門  
蘭蕙含芬松菊在莫教猿鶴怨空村

送友入西山

一徑萬松環柴扉不復闕君行入西嶮我意在南山  
叢菊經霜盡孤雲鎮日閒小窓梅未發如待故人還  
輓叔祖搢卿孝廉

泣杖承庭訓傳經飽亂離千金惟取酒萬境總歸詩  
才拙貧難仕狂深老轉癡尊前飛動意埋沒有誰知  
將出都門贈江載月四首

霜高尊酒小盤桓醉膽輪囷夜不寒倘得夷光君載  
去扁舟烟雨五湖寬

予生素有相如渴欲續茶經下筆難塵海忽逢陸處

士清人詩骨是龍團 以茶為業

空庭落葉旋成堆昨夜西風屋欲摧  
衰柳滿城無可折銷魂且盡掌中杯

南經吳楚北幽燕結客江湖二十年  
囊底黃金行欲盡座中青眼定誰賢

輓王遜齋太守

文藻餘空宅書聲散比隣狂歌聊當哭  
廣廈肯因人風月無今古江山孰主賓  
中興君及見太息四朝身

蘭山道中



合昌黎東  
坡為一手

雪消磴道泥初滑車走山城日未晡茅屋冬披黃襪  
穢麥田春繡綠甍逾盱衡於世將無補抗志歸耕足  
自娛記取眼前風物好郊居併作卧游圖

太湖石

四萬八千頃越與吳各半奇峰七十二縹緲插天漢  
水土互爭搏剛者柔所判陰火煽洪鑪萬劫餘飛炭  
成茲積鐵色純黝寺鋌鍛水精融地脈頑璞豈受礮  
天工好鬥奇人巧謝雕鑿風雷開竅竇烟雨洗漫漶  
高截青岱頂深蟠黃嶽幹古柏根磊砢蒼苔色絢爛  
橫卧洞庭渚峭立震澤岬中藏天下雲肯為耳目玩

昔作江南客屢游太湖畔蒹葭浩無際洄溯日將旰

歸舟索一拳空袖增悵惋何年築石步在無錫西鄉十餘里太湖

之濱有屋數椽花鳥資蕭散盡拔蒼山根具區在儿

近先慈墓田

織素篇

風吹白雲如落花片片飄蕩天之涯青天萬里一輪

月嫦娥不速來人家穿簾窺戶益淒冷舉頭照見梧

桐影翠被香銷春復秋伊威蟋蟀寒相警妾心似水

無波瀾轆轤枉自汲金井冰簟涼深遲夜眠孤燈蕊

重爐無烟灑颯微風動簾押北斗掛在闌干前秦箏

起語真是太  
白俞確士評

真宰上訴天  
應泣方評

趙瑟流塵滿羅裙帶比昔年緩膏珠牽羅老妍華織  
縑織素孰長短裂下鳴機欲寄誰皚皚霜雪不容澣  
長信宮中漏水稀玉門關外雪花飛團扇裁成秋節  
至寒衣製就春風歸從今摺疊箱篋裏香汗輕塵水  
不清能將刀尺識深心萬草千花徒繡刺

且園牆脚有梅一株十年前手植也沒荒棘中  
臘盡未花賦此諷之

凍雀啾啁鶴未回牆陰殘雪覆莓苔荒園一種閒桃  
李每到春時爛漫開

鐵石心腸鼎鼐材童飢鶴冷費疑猜江南地氣多卑

濕移向羅浮大庾來

將赴嶺表友人携酒芙蓉湖上作竟日歡賦此

留別

金尊檀板慰離憂紅粉青山亦盛游  
好友看圓千里月輕梳搖動五湖秋  
故園書到荒三徑滄海人來話十洲  
丹荔黃蕉風物好廣州未必避蘇州

烘梅

紙帳銅瓶位置宜紅爐撥火夜深時  
冰心自有熱腸在風雪前村開幾枝

繞座山茶與水仙冰肌清豔晚寒天  
怪來林下高人

格逐熱噓炎傍日邊

寄虞山曾伯言

一脫朝衫返薜蘿  
便攜雙屐踏維摩  
桑麻雞黍重陽到  
鴻雁江湖秋水多  
橫海鯨鯢聞漸徙  
繞廬松菊近如何  
破山石室今無恙  
白泐東來定見過

送友人出關

銀鞍賽雪寶刀明  
壯士從軍負盛名  
牧馬秋高元兔郡  
枕戈月滿射狐營  
憐君劇有封侯相  
此日難為出塞行  
經略九邊資虎豹  
如今根本重陪京



上海新  
 圖書館  
 藏